

Na osnovu člana 1. Zakona o komunalnim taksama («Sl. list SR BiH», br. 21/77, 35/88 i 26/89), člana 13. Zakona o pripadnosti javnih prihoda u F BiH («Službene novine Federacije BiH», br. 22/06, 43/08 i 22/09) i člana 13. Zakona o principima lokalne samouprave u Federaciji Bosne i Hercegovine («Službene novine Federacije BiH», br.49/06, 51/09) i člana 6. Statutarne odluke o organizaciji Grada Gradačac u skladu sa Zakonom o Gradu Gradačac («Sl. glasnik Grada Gradačac», br.01/19), Gradsko vijeće Gradačac, na ____ radnoj sjednici, održanoj dana _____ godine, donosi

ODLUKU
o komunalnim taksama

I OPĆE ODREDBE

Član 1.

Ovom Odlukom propisuju se komunalne takse, utvrđuju obveznici plaćanja takse, visina i način obračuna takse, rokovi plaćanja i nadzor nad provođenjem ove Odluke.

Član 2.

Takseni obveznik je fizičko ili pravno lice, kao i građanin koji obavlja poslovnu djelatnost ili koristi predmet ili usluge za čije korištenje je propisano plaćanje takse.

Član 3.

Takse se plaćaju za:

1. svaku istaknutu firmu
2. istaknutu firmu za bankomate koji nisu sastavni dio poslovne zgrade banke
3. držanje žive muzike u ugostiteljskim objektima
4. držanje sredstava, organizovanje i priređivanje zabavnih igara i igara na sreću
5. postavljanje reklamnih panoa na javnim i svim drugim površinama
6. isticanje objava, oglasa i saopštenja na posebno uređenim javnim površinama
7. izgradnju građevinskih objekata

Član 4.

Visina takse po predmetima i uslugama za čije korištenje se plaća taksa utvrđuje se Tarifom komunalnih taksa (u daljem tekstu: tarifa).

Član 5.

Komunalne takse iz člana 3. tačka 1, 2, 3 i 4 razrezuje i naplaćuje nadležna ispostava Poreske uprave FBiH, a za ostale takse iz člana 3 ove Odluke nadležan je gradski organ uprave.

Plaćanje komunalne takse iz člana 3. vrši se na depozitni račun Grada i iste predstavljaju prihod budžeta Grada.

Prihod budžeta iz stava 2 ovog člana, predstavlja namjenska budžetska sredstva, koja će se koristiti u svrhu izgradnje i održavanja saobraćajne i komunalne infrastrukture na području grada Gradačca.

Sredstva prikupljena na osnovu ove Odluke, mogu se koristiti za finansiranje i sufinansiranje projekata u oblastima: izgradnje cesta, mostova, vodovoda, kanalizacije,

javnih građevinskih objekata, parkova, trgova, zelenih površina i drugih objekata od javnog značaja.

U godišnjem izvještaju o izvršenju budžeta, Gradskom vijeću će biti predstavljene informacije o namjenskom utrošku ovih sredstava za izgradnju komunalne infrastrukture.

Poreska uprava ima obavezu da svakih 90 dana dostavlja spisak dužnika koji nisu izvršili uplate takse.

Spisak dužnika iz prethodnog stava ovog člana dostavlja se službi nadležnoj za budžet i finansije, radi vođenja evidencija o izvršenim uplatama.

Član 6.

Pravna i fizička lica koja obavljaju poslovnu djelatnost na osnovu odobrenja nadležnog organa, dužna su na vidnom mjestu poslovnog prostora istaknuti naziv firme.

Pod nazivom firme podrazumijeva se naziv firme pod kojim je takseni obveznik registrovan kod nadležnog organa, sjedište, kao i broj poslovne jedinice, kada se firma ističe na poslovnoj jedinici.

Firma se ističe početkom obavljanja djelatnosti.

II OSLOBODANJA OD PLAĆANJA TAKSE I OSNOVE ZA UMANJENJE TAKSE

Član 7.

Od plaćanja takse oslobađaju se:

1. Organi Bosne i Hercegovine
2. Organi Federacije Bosne i Hercegovine
3. Organi Tuzlanskog kantona
4. Organi Grada Gradačac i javne ustanove iz oblasti predškolskog obrazovanja, prosvjete, nauke, kulture, zaštite kulturne i prirodne baštine, sporta, zdravstva, veterinarstva, socijalne zaštite, humanitarne i dobrotvorne organizacije
5. Mjesne i vjerske zajednice
6. Invalidi sa minimalno 20%-tnim tjelesnim oštećenjem, utvrđenim od strane nadležnog organa, te članovi porodica šehida i palih boraca
7. Dobitnici najviših ratnih priznanja („Zlatni ljiljan“, „Zlatna policijska značka“)

Član 8.

Svi obveznici iz tarifnog broja 1, oslobađaju se plaćanja takse za prvu započetu godinu poslovanja, odnosno za godinu u kojoj su započeli obavljanje djelatnosti po pravosnažnosti rješenja nadležnog organa.

Za drugu godinu poslovanja, utvrđuje se visina takse u iznosu od 50% od obračunske vrijednosti takse.

Mlade osobe (starosti do 35 godina) i demobilisani borci, koji po prvi puta pokreću vlastiti biznis, oslobođene su u potpunosti plaćanja komunalne takse za prvu godinu poslovanja, dok se za naredne dvije godine poslovanja utvrđuje iznos od 30 % od obračunske vrijednosti takse.

Zahtjev za oslobađanje od plaćanja takse, odnosno umanjeње iznosa takse, podnosi se, u zavisnosti od tarifnog broja, Poreznoj upravi ili nadležnoj gradskoj službi koja vrši razrez.

Uz zahtjev za oslobađanje od plaćanja, odnosno umanjeње iznosa takse prilaže se rješenje o registraciji poslovnog subjekta, izvod iz matične knjige rođenih za ovlašteno lice poslovnog subjekta.

III NAČIN PRIJAVE I NAPLATE TAKSE

Član 9.

Obveznik takse dužan je, u zavisnosti od tarifnog broja takse, Poreznoj upravi/Ispostava Gradačac ili nadležnoj gradskoj službi za komunalne poslove podnijeti prijavu za razrez takse.

Prijava iz prethodnog stava sadrži sljedeće podatke: naziv firme, sjedište i prebivalište obveznika, broj računa obveznika kod banke, mjesto, ID broj poreznog obveznika i šifru djelatnosti.

Navedeni podaci su dio Obrasca 1, koji čini sastavni dio ove Odluke.

Porezna uprava/Ispostava Gradačac je dužna u roku 15 dana, kopiju prijave razreza takse, dostaviti nadležnoj gradskoj službi za budžet, radi vođenja evidencija.

Nadležna gradska služba za privredu je dužna dva puta u toku jedne kalendarske godine /januar i juli/ dostaviti spisak svih prijavljenih i objavljenih privrednih subjekata na teritoriji grada Gradačca, te objediniti podatke o svim registovanim privrednim subjektima (pravna i fizička lica-obrtnici) i iste dostaviti Poreznoj upravi/Ispostava Gradačac.

Član 10.

Prijava za razrez takse iz člana 3. tačka 1. podnosi se do 28. februara tekuće godine, prema parametrima utvrđenim ovom Odlukom.

Promjene nastale poslije 1. januara tekuće godine, odnosno u toku godine, obveznik je dužan prijaviti Poreznoj upravi najkasnije u roku od 15 dana od dana nastanka promjena, a koje utiču na visinu obračuna takse.

Taksenim obveznicima koji ne podnose prijavu u skladu sa stavom 1. i 2. ovog člana ili daju netačne podatke, razrez takse izvršiće se po taksenoj tarifi uvećanoj za 50%.

Član 11.

Parametri za obračun takse razrez takse iz člana 3. tačka 1. ove Odluke su: osnovica, koeficijent zone, koeficijent djelatnosti i koeficijent oznake firme.

Osnovica za obračun takse utvrđuje se u jedinstvenom iznosu od 365,00 KM za sve obveznike uplate takse na istaknutu firmu.

Koeficijent zone utvrđen je u zavisnosti od infrastrukturnih pogodnosti koje se obezbjeđuju obvezniku takse u zoni u kojoj je istaknuta firma, odnosno u kojoj se obavlja djelatnost.

Zone su utvrđene na osnovu položajne pogodnosti, pod kojom se podrazumijeva obim i stepen izgrađenosti i uređenosti zemljišta komunalnom infrastrukturom, saobraćajna povezanost, stepen pokrivenosti naselja objektima za zdravstvo, obrazovanje, kulturu i prirodni uslovi.

Koeficijent zone utvrđen je u rasponu od 1 do 2, uz interval povećanja od 0,5.

Koeficijent zone za zonu A iz čl. 12. Odluke, utvrđuje se u iznosu 2.

Koeficijent zone za zonu B iz čl. 12. Odluke, utvrđuje se u iznosu 1,5.

Koeficijent zone za zonu C iz čl. 12. Odluke, utvrđuje se u iznosu 1.

Koeficijent djelatnosti predstavlja kategorizaciju djelatnosti utvrđenu prema akumulativnosti djelatnosti i procjeni uticaja razvoja komunalne infrastrukture na poslovanje.

Koeficijent djelatnosti utvrđen je u rasponu od 0,5 do 3, uz interval povećanja od 0,5 za različite kategorije.

Kategorija 1: Obrtnici/fizička lica..... koeficijent 0,5

Kategorija 2: Proizvodnja, trgovačke radnje u maloprodaji, kiosci, agencije, biro, građevinske kompanije, obrti i sve ostale djelatnosti.....koeficijent 1

Kategorija 3: Advokati, notari, zdravstvene ordinacije, ugostiteljstvo, turističke agencije i prevoz putnika, autoškole..... koeficijent 1,5

Kategorija 4: Trgovina na veliko, hipermarketi, supermarketi, tržni centri, transport, apoteke, poljoprivredna apoteka, autokuće, trgovina autodijelovima, špedicije, reciklaže, otpadi, tehnički pregledi..... koeficijent 2

Kategorija 5: Bankomati, komunikacije, pošta, benzinske stanice, elektroprivreda, radio i TV stanice, internet provajderi..... koeficijent 2,5

Kategorija 6: Banke, mikrokreditne organizacije, osiguranja, igre na srećukoeficijent 3

Koeficijent oznake firme odnosi se na izgled i dimenzije table ili druge oznake firme i utvrđen je u iznosu od 1 ili 1,3.

Koeficijent oznake firme u iznosu od 1,3 utvrđuje se za oznake firme u zavisnosti od toga da li je riječ o svijetlećoj oznaci firme ili o površini oznake većoj od 1,5 m x 0,5 m, neovisno od podloge na kojoj je postavljena oznaka firme. Površina oznake firme obuhvata granice od prvog do posljednjeg slova natpisa.

Za oznake firme koje nisu osvijetljene, te čije dimenzije zauzimaju manju ili jednaku površinu iznosu 1,5 m x 0,5 m, utvrđuje se sekoeficijent u iznosu od 1.

Za oznake firme na bankomatima koji nisu sastavni dio objekta koeficijent oznake firme se utvrđuje u iznosu od 1.

Član 12.

Zone iz stava 3 člana 11. su:

ZONA A, koja obuhvata sljedeće ulice:

H.k. Gradašćevića, Titova, Sviračka (glavna dionica od raskrsnice na Tabli do kružnog toka kod Komunalca), **Josipa Šibera, Hadžiefendijina, Trtava genocida u Srebrenici** (od raskrsnice do skretanja za naselje Rakija), **Šehitluci** (glavna dionica), **Sarajevska** (glavna dionica magistralnog puta od Energopetrola do granice entiteta prema Šamcu), **Tejzeznička** (glavna saobraćajnica od Europrofija do stadiona Banja Ilidža), **VI Bataljona** (od Energopetrola do entitetske granice prema Modriči), **dionica magistralni put Gradačac – Ormanica** (od raskrsnice u industrijskoj zoni Kerep do Ormanice), **dionica glavnog magistralnog puta Tuzla – Orašje** (od tunela Ormanica do izlaska sa teritorije grada Gradačac prema Orašju).

ZONA B, koja obuhvata pojas unutar obuhvata sljedećih ulica:

Hazna, Mustafe Novalića, VI bataljona (sve osim A zone), **XVI muslimanske partizanske brigade, Ahmeta Beširovića, Sviračka** (sve osim A zone), **Šehitluci** (sve osim zone A), **Esada Taslidžića, Trtava genocida u Srebrenici** (sve osim zone A), **Branilaca grada, Škorići, Sarajevska** (sve osim zone A), **25. novembar, Udarnička, Bosanskih gazija.**

ZONA C, koja obuhvata sva ostala područja na teritoriji grada Gradačca, a koja ne obuhvataju prethodne dvije zone.

Grafički prikaz zona je dostupan u službi nadležnoj za komunalne poslove.

Član 13.

Za neblagovremeno plaćanje takse propisane ovom Odlukom plaća se zatezna kamata po stopi utvrđenoj prema propisima FBiH za neblagovremeno plaćanje javnih prihoda.

Član 14.

Obveznik takse koji organizuje živu muziku, dužan je najkasnije sedam dana prije početka organizovanja žive muzike, prijaviti Poreznoj upravi/Ispostava Gradačac organizovanje žive muzike, kao i dan završetka organizovanja žive muzike.

Član 15.

Ukoliko porezni obveznik uplate takse iz Tarifnog boja 1. ne podnese poreznu prijavu u zakonom propisanom roku, Porezna uprava će podnijeti poreznu prijavu umjesto

poreznog obveznika, shodno članu 21. Zakona o Poreznoj upravi Federacije BiH («Sl. novine FBiH, broj 33/02, 28/04, 57/09 i 40/10). Na ovako podnesenu poreznu prijavu obveznik ima pravo žalbe u roku od osam dana, Federalnom ministarstvu finansija. Za prijavu koja nije podnesena u zakonom propisanom roku primjenjivat će se kaznene odredbe po članu 84. Zakona o poreznoj upravi FBiH.

Član 16.

Ako takseni obveznik u propisanom roku ne uplati taksu, Porezna uprava će izdati nalog banci kod koje takseni obveznik drži novčana sredstva za prinudnu naplatu i za prijenos duga komunalne takse i pripadajuće kamate sa računa taksenog obveznika na račun korisnika takse.

Član 17.

Ukoliko se na način iz prethodnog člana ne može podmiriti taksena obaveza u periodu od 60 dana od dana izdavanja naloga za prijenos sredstava banci, nadležna Porezna uprava će donijeti rješenje o prinudnoj naplati takse, kamata i troškova postupka taksenog obveznika.

Član 18.

Pravo na naplatu takse, kamata, troškova prinudne naplate zastarijeva za tri godine po isteku godine u kojoj je obaveza plaćanja takse, utvrđena od strane nadležnog organa. Pravo zastare prekida se svakom radnjom nadležnog organa za naplatu, poslije koje počinje teći novi rok zastare.

IV POVRAT TAKSE

Član 19.

Obveznik od kojeg je taksa ili kamata naplaćena, a koju nije bio dužan platiti ili je pogrešno obračunata, ima pravo na povrat sredstava u ukupnom ili djelimičnom iznosu.

Zahtjev za povrat sredstava se podnosi Poreznoj upravi, koja je nadležna za utvrđivanje takse, odnosno nadležnoj gradskoj službi.

Porezna uprava, odnosno nadležna gradska služba je dužna da u roku od 30 dana odluči o zahtjevu.

Član 20.

O dijelu razreza takse, naplate zastare, povrata i ostalih poslova vezanih za komunalne takse, u kome to nije regulisano ovom Odlukom, primjenjivat će se odredbe Zakona o poreznoj upravi FBiH i Zakona o upravnom postupku.

V NADZOR

Član 21.

Nadzor nad realizacijom ove Odluke vrši Porezna uprava – Ispostava Gradačac, te gradske službe, svaka iz svoje nadležnosti.

Nadzor nad realizacijom ove Odluke vrše i nadležne inpekcijske službe, svaka iz svoje nadležnosti.

VI PRELAZNE I ZAVRŠNE ODREDBE

Član 22.

Danom stupanja na snagu ove Odluke prestaje da važi Odluka o komunalnim taksama («Sl. glasnik Općine Gradačac», br.6/2010 i 3/2018).

Član 23.

Za spise i radnje za koje je taksena obaveza nastala do stupanja na snagu ove Odluke, odnosno do njezine primjene naplatit će se taksa koja je bila propisana u trenutku nastajanja taksene obaveze.

Član 24.

Ova Odluka stupa na snagu 8 dana od dana objavljivanja u Službenom glasniku Grada Gradačac.

Bosna i Hercegovina
Federacija Bosne i Hercegovine
Tuzlanski kanton
Grad Gradačac

-Gradsko vijeće-

Broj: _____
Gradačac: _____ . godine

Predsjedavajući
Gradskog vijeća

Husein Kujraković, s.r.

TARIFA

komunalnih taksa koje se plaćaju na području grada Gradačac

Tarifni broj 1.

Za svaku istaknutu firmu, oznaku, obilježje ili natpis na poslovnim i drugim prostorijama objektima i slično, kojim se označava da određena pravna ili fizička osoba obavlja registrovanu djelatnost ili zanimanje, plaća se godišnja taksa, obračunata na sljedeći način:

Iznos takse = Osnovica x Koeficijent zone x Koeficijent djelatnosti x Koeficijent oznake firme

Kriteriji za obračun takse su detaljno određeni u čl. 11. Odluke o komunalnim taksama.

Napomena:

1. Podružnice, poslovne jedinice, ekspoziture, filijale i dr. oblici pravnih subjekata, čije sjedište nije na teritoriji grada Gradačca, plaćaju komunalnu taksu pod istim uslovima kao i pravni subjekti čije je sjedište u Gradačcu.

2. Taksa za obrte, koji se u skladu sa Uredbom o zaštiti starih i tradicionalnih obrta («Službene novine Federacije BiH», br.66/09, 38/10 i 16/12), smatraju starim i tradicionalnim, umanjuje se za 70%.

Tarifni broj 2.

Takse za držanje muzike uživo su:

1. Za držanje muzike uživo u ugostiteljskim objektima mjesečno.....350,00 KM
2. Za držanje muzike uživo u ugostiteljskim objektima po vikendu /vikend uključuje jedan paket dana u mjesecu petak, subota i nedjelja/.....150,00 KM
3. Za držanje muzike uživo u ugostiteljskim objektima tokom praznika po danu250,00 KM
4. Za držanje muzike uživo u ugostiteljskim objektima po danu /ponedjeljak, utorak, srijeda, četvrtak/ 50,00 KM
5. Za držanje muzike uživo u ugostiteljskim objektima po danu / petak, subota i nedjelja / 100,00 KM

Ukoliko obveznik uplati mjesečni iznos takse iz tačke 1., oslobođen je obaveze dodatnog plaćanja takse iz tačke 2., 3., 4. i 5. ovog tarifnog broja.

Tarifni broj 3.

Za držanje sredstava za zabavne igre i držanje uređaja za igre na sreću koje donose novac, plaća se **godišnje po jednom komadu**, odnosno predmetu ili uređaju, kako slijedi:

1. Na bilijar stolove, flipere, automate, pikado play station i druga sredstva za igru gdje je dobitak isključivo u određenom broju igara.....250,00 KM
2. Na uređaje od igara na sreću koje donose novac.....200,00 KM

Napomena:

Pod uređajima za igre na sreću koje donose novac, podrazumijevaju se elektronski ili mehanički uređaji ili drugi ili drugi uređaji koji tokom igre omogućavaju igraču dobitak u novcu ili žetonima koji su naplativi u novcu.

Tarifni broj 4.

Za reklamne panoje pričvršćene za tlo i za samostojeće, pokretne reklame na javnim, zelenim površinama i u putnim pojasevima (lokalne i nekategorisane ceste) plaća se komunalna taksa kako slijedi:

1. U zoni A plaća se komunalna taksa za 1m² zauzete površine u iznosu od 300,00 KM godišnje.
2. U zoni B plaća se komunalna taksa za 1m² zauzete površine u iznosu od 200,00 KM godišnje.
3. U zoni C plaća se komunalna taksa za 1m² zauzete površine u iznosu od 100,00 KM godišnje.

Za dvostrane reklame iz stava 1 ovog člana, iznos utvrđene takse se uvećava za 50%.

Navedeni iznosi takse naplaćuju se u godišnjem iznosu i za ostale reklame, koje se odnose na osvijetljene i neosvijetljene plakate različitih formata, osim svijetlećih reklama u formi ekrana.

Za reklame na privatnim površinama (vlasništvo fizičkih i pravnih lica), plaća se komunalna taksa u iznosu 50% od takse utvrđene u stavu 1 ovog Tarifnog broja.

Napomena:

- a) za isticanje reklame potrebno je pribaviti urbanističko-tehničku dokumentaciju prema odredbama važećeg Pravilnika o postavljanju reklamnih znakova na cestama;
- b) pod 1m² zauzete površine smatra se veličina, površina panoa istaknute firme ili reklame na kojoj se nalazi natpis (dužina x širina = zauzeta površina).

Tarifni broj 5.

Reklama (LED ekrani, svijetleće reklame, koje podrazumijevaju potrošnju električne energije i sl.) postavljena na javnim objektima, zgradama, zelenim površinama, ogradama, u putnim pojasevima (lokalne i nekategorisane ceste) i sl., postavlja se po pribavljenoj urbanističko - tehničkoj saglasnosti.

1. U zoni A plaća se komunalna taksa za 1m² zauzete površine u iznosu od 600,00 KM godišnje.
2. U zoni B plaća se komunalna taksa za 1m² zauzete površine u iznosu od 400,00 KM godišnje.
3. U zoni C plaća se komunalna taksa za 1m² zauzete površine u iznosu od 200,00 KM godišnje.

Za dvostrane reklame iz stava 1 ovog člana, iznos utvrđene takse se uvećava za 50%. Navedeni iznosi takse naplaćuju se u godišnjem iznosu.

Za reklame ove vrste na privatnim površinama (vlasništvo fizičkih i pravnih lica), plaća se komunalna taksa u iznosu 50% od takse utvrđene u stavu 1 ovog Tarifnog broja.

Napomena: pod 1m² zauzete površine smatra se veličina, površina panoa istaknute firme ili reklame na kojoj se nalazi natpis (dužina x širina = zauzeta površina).

Za korištenje reklamnih tabli u okviru gradilišta, komunalna taksa se utvrđuje mjesečno, i to:

- za korištenje tabli kojima se reklamira vlastita djelatnost 50 KM/kom,
- murali i PVC folije na zidu objekta 50 KM/kom.

Tarifni broj 6.

Za isticanje objava, oglasa i saopštenja na posebno uređenim javnim površinama (aleje, trgovi, parkovi i drugo), plaća se mjesečna naknada i to:

- za seriju do 100 kom.....50 KM
- za seriju preko 100 kom.....100 KM

Tarifni broj 7.

Za izgradnju sljedećih građevinskih objekata plaća se taksa i to:

- za ekonomska dvorišta, otvorena skladišta građevinskog materijala, auto-otpad, otvorene platoe, auto – praone, parkirališta, sajmišta, otvorene pijace i sl., plaća se komunalna taksa u iznosu od 0,50 KM po m²,
- za postavljanje ograda plaća se komunalna taksa u iznosu od 0,50 KM po metru dužnom,
- za postavljanje instalacija: PTT, kablovske TV i slično, plaća se komunalna taksa u iznosu od 1,00 KM po dužnom metru,
- za elektroenergetske instalacije, vjerske objekte, objekte MZ - a i objekte čiji je investitor Grad i gradski organi, neće se naplaćivati komunalna taksa iz ovog tarifnog broja.

Naknade iz ovog tarifnog broja propisuju se u urbanističkoj saglasnosti, a obračunavaju se i naplaćuju u postupku izdavanja građevinske dozvole, osim za ograde van ulične strane, kada se naplata vrši u postupku izdavanja urbanističke saglasnosti.

Tarifa komunalnih taksi koje se plaćaju na području grada Gradačac završava se Tarifnim brojem 7.

Obrazloženje

Odluke o komunalnim taksama

Pravni osnov za donošenje ove Odluke sadržan je u čl. 1. Zakona o komunalnim taksama (Sl. list SR BiH, br. 21/77, 35/88 i 26/89), kojim je propisano da komunalne takse propisuje nadležni predstavnički organ jedinice lokalne samouprave.

U skladu sa činjenicom da Bosna i Hercegovina, Federacija BiH i Tuzlanski kanton nisu donijeli zakon kojim je regulisana komunalna taksa na području države, entiteta i kantona, kao i da je Ustavom, odnosno Aneksom II Ustava Bosne i Hercegovine, preuzeta primjena važećih propisa iz SRBiH. Shodno tome, Zakon o komunalnim taksama SRBiH je korišten kao pravni osnov za donošenje ove Odluke.

Članom 3. Zakona propisano je, izmeđuostalog da se naplata komunalne takse može vršiti za istaknutu firmu, držanje žive muzike, držanje sredstava za igre na sreću, objave i oglase, izgradnju građevinskih objekata i dr.

Kantonalni zakoni u Federaciji BiH, koje su donijeli određeni kantoni, su također temeljeni na načelima utvrđenim Zakonom o komunalnim taksama iz 1977. godine i njegovim izmjenama iz 1988. i 1989. godine.

Osim navedenog propisa, pravni osnov za donošenje ove Odluke sadržaje je i u odredbama čl. 13. Zakona o principima lokalne samouprave u Federaciji Bosne i Hercegovine («Službene novine Federacije BiH», br.49/06, 51/09), kojim je propisano da Vijeće u okviru svojih nadležnosti donosi propise o porezima, taksama, naknadama i doprinosima jedinice lokalne samouprave u skladu sa Zakonom. Isto ovlaštenje je utvrđeno čl.6. Statutarne odluke o organizaciji Grada Gradačac u skladu sa Zakonom o Gradu Gradačac («Sl. glasnik Grada Gradačac», br.01/19).

Takođe članom 13. Zakona o pripadnosti javnih prihoda u FBiH («Službene novine Federacije BiH», br. 22/06, 43/08 i 22/09), utvrđeno je da jedinicama lokalne samouprave u 100%-tnom iznosu pripadaju naknade i takse koje se naplaćuju u skladu sa propisima jedinica lokalne samouprave.

Prilikom izrade teksta ove Odluke uvažene su i odredbe Uredbe o zaštiti tradicionalnih i starih obrta («Službene novine Federacije BiH», br.66/09, 38/10 i 16/12),

Odluka je sačinjena iz šest poglavlja:

I – Opće odredbe, kojima je navedeno šta je predmet ove Odluke, definisan termin taksenog obveznika, pojašnjena svrha i predmet naplate takse, te nadležnost za naplatu takse;

II – Oslobođanja od takse i osnove za umanjenje takse, kojima je regulisan osnov za oslobođanja i umanjenja takse;

III - Način prijave i naplate takse, kojim je regulisano kome se prijava podnosi, sadžaj obrasca za prijavu, rok za podnošenje prijave za razrez takse, parametri za obračun takse i rok zastare takse;

IV – Povrat takse, kojim je regulisan povrat takse i rok odlučivanja o povratu takse;

V- Nadzor, kojim se reguliše provođenje nadzora nad odredbama ove Odluke;

VI- Prelazne i završne odredbe, kojim se reguliše prestanak važenja Odluke o komunalnim taksama («Sl. glasnik Općine Gradačac», br.6/2010 i 3/2018) i naplata takse za obavezu nastalu do stupanja na snagu ove Odluke i stupanje na snagu ove Odluke.

Sastavni dio ove Odluke su tarife utvrđene u Tarifi komunalnih taksa koje se plaćaju na području grada Gradačac, Obrazac 1 i Obrazac 2.

Navedenom Tarifom komunalnih taksa regulisano je sedam tarifnih brojeva, u zavisnosti od predmeta naplate takse (oznaka istaknute firme, uključujući i oznaku firme na bankomatima, držanje sredstava za zabavne igre i igre na sreću, postavljanje reklama na javnim, zelenim površinama i putnim pojasevima, postavljanje osvijetljenih reklama, isticanje objava, oglasa i saopštenja na posebno uređenim javnim površinama i izgradnju građevinskih objekata). Obrazac 1 namijenjen je za prijavu takse za istaknutu firmu, uključujući i istaknute firme na bankomatima van objekta poslovnice.

Kriteriji, odnosno parametri za obračun takse, utvrđeni su kroz osnovicu (za Tarifni br. 1), koeficijent zone, odnosno položajne pogodnosti za poslovanje, akumulativnost djelatnosti, predstavljen kroz koeficijent djelatnosti, kao i koeficijent oznake firme, koji se idnosi na dimenzije i izgled tabele ili druge oznake firme.

Osnovica za obračun takse za Tarifni br. 1 predstavlja simboličan iznos koji je istovjetan broju dana u jednoj kalendarskoj godini (1 KM po 1 danu).

Uvažavajući činjenicu da je Grad Gradačac, jedinica lokalne samouprave koja obezbjeđuje povoljno poslovno okruženje za razvoj privrede, definisani su parametri za obračun takse koji umanjuju finansijsko opterećenje za sve oblasti proizvodnje, kao i za fizička lica-obrtnike.

Ostali tarifni brojevi, utvrđeni su po lokacijskom, vremenskom i kvantitativnom kriteriju.

Obrazac 2 namijenjen je za prijavu takse za držanje žive muzike, držanje sredstava za zabavne igre i igre na sreću. Ovi obrasci dostavljaju se nadležnoj Poreskoj upravi/Ispostava Gradačac.

Prijava takse za ostale tarifne brojeve vrši se u formi zahtjeva upućenog prema gradskoj službi, nadležnoj za komunalne poslove.

Gradsko vijeće je u protekle 3 godine na sjednicama pokrenulo niz inicijativa o izmjenama postojeće Odluke, kao i mogućnost povećanja prihoda jedinice lokalne samouprave, po ovom osnovu. Takođe prihodi koju su u prethodnom periodu naplaćeni po osnovu komunalnih taksi, nisu utvrđeni kao namjenski prihodi budžeta.

S tim u vezi, bilo je neophodno da se ovi prihodi utvrde kao namjenski i da se Gradsko vijeće informiše o utrošku ovih sredstava u svrhu razvoja komunalne infrastrukture.

S druge strane, u proteklih 10 godina su, kroz direktno finansiranje iz budžeta jedinice lokalne samouprave i sufinansiranje infrastrukturnih projekata (izgradnja poslovnih zona, putevi, vodovodi, kanalizacija i dr.), izvršena značajna finansijska ulaganja. Ova ulaganja su doprinijela daljem razvoju privrede i poduzetništva na području našeg grada.

Prema projekcijama i analizama naplate prihoda u nadležnosti jedinice lokalne samouprave, ovako utvrđeni i propisani parametri za obračun uz povećani angažman u oblasti kontrola primjene ove Odluke, trebali bi da povećaju prihode od komunalnih taksa za minimalno 20% na godišnjem nivou.

Za provođenje ove Odluke nisu potrebna dodatna budžetska sredstva.

Shodno svemu navedenom, utvrđen je nacrt Odluke u datom tekstu.

OBRAĐIVAČ
Gradska služba za urbanizam, investicije
i komunalne poslove

PREDLAGAČ
Gradonačelnik
mr.sci Edis Dervišagić

I PODACI O POREZNOJ OBVEZNIKU-FIZIČKOM ILI PRAVNOM LICU

Identifikacioni broj poreznog obveznika: _____

Naziv poreznog obveznika: _____

Adresa: _____

Transakcijski račun: _____

II GRADSKA KOMUNALNA TAKSA-PRIJAVA ZA _____ godinu

R.B.	ID br.poslovne jedinice	Adresa	Osnovica	Koeficijent zone	Koeficijent djelatnosti	Koeficijent oznake firme	Iznos takse
1	2	3	4	5	6	7	8 = 4x5x6x7
UKUPNO							

Dimenzije oznake firme veće od 1,5x0,5 Dimenzije oznake firme manje ili jednake 1,5x0,5

Osvijetljena oznaka firme

Datum: _____

Podnosilac prijave: _____

Ukoliko porezni obveznik uplate takse iz Tarifnog boja 1. ne podnese poreznu prijavu u zakonom propisanom roku, Porezna uprava će podnijeti poreznu prijavu umjesto poreznog obveznika, shodno članu 21. Zakona o Poreznoj upravi Federacije BiH («Sl. novine FBiH, broj 33/02, 28/04, 57/09 i 40/10). Na ovako podnesenu poreznu prijavu obveznik ima pravo žalbe u roku od osam dana, Federalnom ministarstvu finansija. Za prijavu koja nije podnesena u zakonom propisanom roku primjenjivat će se kaznene odredbe po članu 84. Zakona o poreznoj upravi FBiH.

I PODACI O POREZnom OBVEZNIKU-FIZIČKOM ILI PRAVNOM LICU

Identifikacioni broj poreznog obveznika: _____

Naziv poreznog obveznika: _____

Adresa: _____

Transakcijski račun: _____

II GRADSKA KOMUNALNA TAKSA-PRIJAVA ZA _____ godinu

TAKSA ZA DRŽANJE SREDSTAVA ZA IGRE NA SREĆU

R.B.	ID br.poslovne jedinice	Adresa	Vrsta uređaja	Broj komada	Iznos takse po kom.	Ukupno
1	2	3	4	5	6	7 = 5x6
UKUPNO						

TAKSA ZA ŽIVU MUZIKU

R.B.	ID br.poslovne jedinice	Adresa	Datum/period za koji se taksa plaća	Taksa za radne dane	Taksa za dane vikenda ili praznika	Mjesečni iznos takse
1	2	3	4	5	6	
UKUPNO (4, 5 ili 6 ili 4+6)						

Datum: _____

Podnosilac prijave: _____

Ukoliko porezni obveznik uplate takse iz Tarifnog boja 1. ne podnese poreznu prijavu u zakonom propisanom roku, Porezna uprava će podnijeti poreznu prijavu umjesto poreznog obveznika, shodno članu 21. Zakona o Poreznoj upravi Federacije BiH («Sl. novine FBiH, broj 33/02, 28/04, 57/09 i 40/10). Na ovako podnesenu poreznu prijavu obveznik ima pravo žalbe u roku od osam dana, Federalnom ministarstvu finansija. Za prijavu koja nije podnesena u zakonom propisanom roku primjenjivat će se kaznene odredbe po članu 84. Zakona o poreznoj upravi FBiH.